

Izjava OHR-a na konferenciji za medije međunarodnih organizacija

OHR očekuje napredak u vezi ispunjavanja zahtjeva za ulazak u Evropsku uniju i članstvo u Partnerstvu za mir

OHR je jučer pozdravio potpisivanje zajedničke deklaracije svih stranaka koje imaju svoje predstavnike u Zastupničkom domu Bosne i Hercegovine, a kojom su se obavezali na spremnost da postignu konsenzus kako bi ostvarili članstvo u Evropsku uniju i NATO-ov program Partnerstvo za mir.

OHR sa nestrpljenjem očekuje da se ovaj sporazum prenese u istinsku političku pokretačku snagu kao podršku zahtjevima za Sporazum o stabilizaciji i pridruživanju Evropskoj uniji i članstvu u NATO-ov program Partnerstvo za mir.

Ključni test predstavlja usvajanje zakona o internoj sigurnosti BiH, koji uključuje mjere za uspostavljanje državne policijske agencije u Bosni i Hercegovini koja je sposobna boriti se sa organiziranim kriminalom, te državnu obavještajnu agenciju, kao svaka druga država u Evropi.

Komisija za pitanja odbrane i sigurnosti Parlamentarne skupštine BiH je jučer Parlamentarnoj skupštini BiH prosljedila Nacrt zakona o obavještajno-sigurnosnoj agenciji na daljnje razmatranje, što smatramo ohrabrujućim.

Nacrt koji je Komisija prosljedila sadrži manje izmjene i dopune, koje bi se trebale promijeniti kako bi Zakon bio u skladu sa evropskim standardima i kako bi se stvorio pravni okvir za kreiranje moderne, učinkovite i demokratski odgovorne

agencije. Mi smo uvjereni da će se izvršiti neophodne promjene.

OHR također očekuje od Vijeća ministara da na današnjoj sjednici učini ozbiljan napredak po pitanju zakona u vezi reforme SIPA-e, te paketa zakona koji trebaju ojačati kapacitet BiH da se bori sa ozbiljnim i organiziranim kriminalom.

BiH je jedina država u Evropi koja nema policijsku agenciju na državnoj razini i koja je odgovorna za borbu protiv organiziranog kriminala, što je jedan od razloga da organizirani kriminal koristi BiH kao bazu i koridor ka Evropi.

Premijer Terzić je preuzeo inicijativu apelirajući svoje kolege u Vijeću ministara da usvoje ovaj paket za borbu protiv kriminala čim prije je to moguće. Očekujemo od ostalih ministara u Vijeću ministara, naročito od gospodina Mladena Ivanića, da stave na stranu različite političke interese kako bi ova država dobila organizaciju sposobnu da zaštiti građane od mafije.

Drugi razlog radi kojeg Vijeće ministara, gospodin Đerić i njegove kolege u Republici Srpskoj bi trebali podržati ovaj paket je da ovo također predstavlja jedan od 16 preduvjeta iz Studije izvodljivosti Evropske komisije.

Gospodin Ivanić će htjeti osigurati da političari iz reda srpskog naroda u institucijama BiH ne budu prepreka na putu ka Evropi, ili da ne dozvole Bosni i Hercegovini stvaranje potrebnih institucija koje bi se borile protiv organiziranog kriminala koji pljačka i teroriše građane ove države. Gospodin Ivanić ima posebnu odgovornost po ovom pitanju kako u službi ministra inostranih poslova tako i kao lider stranke čiji je

član gospodin Đerić.

Postoji dosta nejasnih informacija po pitanju ovih reformi. Dozvolite mi da razjasnim: ove reforme će dati ovoj državi sredstvo da se bori protiv organiziranog kriminala i terora: ukratko, ovaj paket za borbu protiv kriminala je ključni test koji će pokazati da li su bh. lideri spremni ozbiljno shvatiti pitanje nacionalne sigurnosti ove države. Ovo je također test ozbiljnosti BiH po pitanju reformi: reformi koje kreiraju institucije BiH, usvajaju institucije BiH i koje su u skladu sa evropskim standardima.